

## IBYAHISHUWE II

Mupenzi Vénuste

Wowe nsogongeza iyi nganzo  
Reka mbiguhe ubyumve uhore  
Hato utazangaya ko natinze  
Kandi waramenye ko natashye  
Ukaba nta mpamba wampaye  
Ngo njye guhumuriza abo nsanga  
Ngo bamenye y' uko washyitse amahoro  
Dore wafashe iy ' Abagesera  
N' ubo nta nkuru mbi wasize.

Warambejije aho nagiyeye  
Ntabwo wambajije uko nagiyeye  
Kandi ya nyama y' umuhigo  
Kare nakekaga ko ari ihoho  
Narayimize ivugira mu nda  
Hafi kumpagama mu muhogo  
Aka ya mbeba izira akaryoshye.

Aho hantu umbaza ni heza  
N' iyo uhageze uranaharara  
Wahahinga ugasarura,  
Hera imbuto zitwa amahoro  
Hariyo impuha zitagira ubugi  
Ntabwo zikomeretsa ubugingo  
Dore ko ari impuhwe ziganje  
Zitatuma uhungabana cyane.

Ntabwo nsoroma ku giti cy'amahwa  
Nka kimwe nasize mu wo nakonze  
Ukorera kikaguhina inkokora  
Wakibagarira ukababwa cyane  
Wagisasira ukaraswa nabi  
N' imihini yacyo itera amabavu.

Aho hantu ndahakubwira  
Hariyo ababyeyi bazi kurera  
Batagurukana n'ibiguruka  
Boshye abakumbuye kubyiruka  
Kandi baribarutse urubyiruko  
Rumwe barwanira uduce tw' ungutiya  
Boshye abamazwe n'agashungo  
Mu ngeso ntindi zo gucumura.

Intashyo watumye yaje iguruka  
Nyisoma nicaye mu mfuruka  
Numva insaba kuzagaruka  
Dore ko nta ngaruka bigomba  
Kurora imyaka nasize yera  
Gukoma akamo cya gisiga  
Kirimo kona imbuto ziteze  
Ndetse na ya siha yo ku irembo  
Isoroma isandaza ibyo isanze  
Isahura cyane ishyizeho umwete  
Biryana nabibye niyushye akuya.

Narumvise nsera mu nda  
N' iyo kandi inkuru ziraza  
Amaguru zayarushije Sarwaya  
Zaranyarutse kurusha umuyaga.

Numvise ko za Sakabaka  
Zihora mu bicu zirekereje  
Ko hagira usohoka ngo zihe iryinyo  
Muri ya mishwi nasize icuka.

Ngo ya nkoko yabaye inkware  
Ngo ikwiye akamo itaroha izindi  
Dore ko itera igaterera iyo  
Ngo amahuri yayo yuje amahano  
Yuzuye ibihuru iyo mu mihana.

Ngo ya Mutamu yarasizoye  
Ngo yahauye na ya mpyisi Bihehe  
Ishyira ku mbehe irahimbarwa  
Ikubita ubuvumo irisegura.

Ngo ya bihogop ntabwo icyonsa  
Cyane ko izwiho kuba iya Mweru  
Ngo ahubwo yabaye nyakijoro  
Ngo irara igenda inzuri zose  
Izayo ziboroga mu kiraro.

Erega na burya yari Sagihobe  
Dore ko inyange yera amababa  
Ariko umubiri ufite ubusembwa  
Cyangwa umutima ari ikijuju.

Ntugakangwe n' imbwa y' inzungu

amabara yose ntayibera  
N' iyo niyorororeye ni uko  
Kabone n' iyo yaba ubururu  
Cyangwa umutuku uhiye neza  
Nk' inzobe nziza inyerera cyane  
Boshye urubura rwo mu bukonje  
Ubu bw' i Burayi bwayiraruye  
Burya ni uruhu yifubise.

Erega intare ntiba umuntu  
N' iyo wayambika agatimba  
Ntishira intimba ngo ubone ishimye  
Ahubwo ihora ishavuza imitima  
Utayihunga ikaguha iryinyo.

Ni igikoko nareze imyaka  
Kitamoka cyane ariko kiryana  
Naciye kuri nyina ari ikibwana  
Ngo ngikize inzira y'amavunane  
No kuva ku ivuko intungamubiri  
Ndakusanya ngo gishime igaburo.

Nta nyamaswa yitegereza  
Nticyaguheka uri ku rugendo  
N' iyo unaniwe ukagwa agacuho  
Kirikomereza urugendo  
Bugacya kimokera mu rw' undi.

Niba ukibona hirya yanjye  
Si uko kibuze amatovu iwanjye  
Ahubwo ni umwijuto w' ikinonko  
Ni ukutagira intera mu bwonko  
Ni kwa kwitera akazana  
Ntushishoze ngo umenye akazaza.

Amaguru atambereye ibinanira  
Ngo ntonekwe cyane n' iyi myate  
Naza wese nshyizeho akete  
Ndetse ngusange aho ku cyate  
Nkubaze igituma unsiba mu bawe  
Nk' aho navuze ayica impfizi.

Ntabwo nkabiriza iyi nganzo  
Ubyumve neza bibe umugambi  
Maze umbwire tunoze ingingo  
N' iyo byaba ari n' ibiruhije

Byaba biruta ibyambabaje  
Maze dusangire insina ikonje  
Twembi twibukiranye imyaka  
Na ya myaku yahise igende  
Nka Nyomberi izagwe ishyanga  
Isyamba ryacu ribe ryeru  
Kandi ryera ihirwe ku mitima.

Naza cyane nk' uwisanga  
Wenda IRYINYO twarisura  
Na ya mirishyo yo mu GISOPE  
Cyangwa igisosi cyo muri SAFARI  
Tukikura ka KABAGARI  
Kabamo itungo n' inyamunyu  
Bituma bose uko bahagenda  
Baryoherwa ubudasigaza.

Nazagaruka nshize urukumbu  
rwa wa MUKEBE utumara irungu  
Ndebe UMURERWA ko ashagawe  
Maze muryohereze imisango.